

Rapport da gestiun 2018

Charas commembras, chars commembers, charas faaturas, chars fauteurs
charas amias e chars amis da La Fliana

Quist rapport cumpiglia la perioda dals 20 marz 2018 fin al di d'hoz. Sper las tractandas statutarias ed il program cultural, s'ha la suprastanza occupada impustüt cul avegnir da la Chasa Fliana e da nossa società. Tala accumulaischa duos dovairs, nempe dad üna vart l'organisaziun e la realisaziun da cuors ed activitats chi's drizzan a tuot la populaziun e da tschella vart la gestiun ed il mantegniment da la Chasa Fliana. Quistas duos grondas incumbenzas inchargian ferm la suprastanza. As basond sün quist fat, ma eir otras ponderaziuns han animà a la suprastanza da's occupar cun la chosa.

Dals 23 october fin als 11 december 2018 ans vain reunits, sco üsità, mincha mardi a las 09:15 h in la sala polivalenta a Lavin. Meditaziun, referat cun discussiun, schoppa da giuotta cun desert e caffè in chasa Fliana e davomezdi lavurs in gruppas, scumparti in differents locals in cumün, quai es stat il program dal di. Manà tras vain ils seguaints cuors generals: Lavurs da man da tuot gener cun Mengia Bonifazi, Lavin – pitturar cun culuors d'aquarell cun Lea Gredig, Zuoz. Ella ans ha güdà l'ultim mumaint our da la buoglia, causa cha nossa fidela manadra Cilgia Nogler, Bever, ha gnü ün accidaint. – Calligrafia, differentas scritüras ed ornamentals cun Christa Pinggera, Zernez – giovar teater cun Ottilia Cavelti, Ftan – fieutrar bes-chas e fluors cun Gaby Famos, Vnà – gimnastica per as tgnair corporalmaing e mentalmaing fits cun Anny Unternährer, Scuol – pitschnas figüras in lain cun Peter Jud, Pany – cuors da cuntinuaziun per laptop cun Duri Denoth, Sent – ed atelier da scriver cun Beat Senn, Zizers. Per las pauras e'ls paur es gnü sport duos cuors. Il cuors sur da la sandà da vadels ha gnü lö in november 2018 a Zernez ed es gnü manà tras in collavuraziun cun la Clinica Alpina. Passa 40 participantas e participants han tut part al cuors quai chi'd es ün grond success. Il seguond cuors cul titel tips e trics pel büro nun ha causa mancanzà da participants pudü gnir manà tras.

“Mieu mel es l'increschantüna – ün tschüt sün l'emigraziun grischuna da pastiziers e cafetiers”, referat da Peter Michael-Cafilisch, Arezen, Stussavgia – «Ouvra Clemgia – Il cumanzamaint da l'electrisaziun in Engiadina Bassa», referat da Reto Vitalini, Scuol – «Richtig Essen im Alter. Eine Herausforderung!?!», referat da Doris Berther, Samedan – «La musica populara da l'Engiadina», referat da Jachen Erni, cun cooperaziun da la Chapella Erni – il referat «Uffants e medias novas: tanter schanzas e sfidas», da Madlaina Semadeni, vain stuvü clomar gio causa malatia. Mario Pult, Ftan, ha rimplazzà ad ella ed ha tegnü ün referat sur da sia lavur pro la Lia Rumantsch – «Depression und Therapiemöglichkeiten», referat e prelecziun our da seis cudeschs, da dr. med. Melitta Breznik – «Jakobsweg», referat da Gian Clalüna, Segl, sur dal tema «Istorgias ed inscunters d'ürant set ons sün la via da peleginadi» – «Bunura d'Advent» cun prelecziun dad Anna Mengia Correia-Santos-Etter, Martina, our dal cudesch «Jahreszeiten – Lebenszeiten», Bäuerinnen und Bauern erzählen. In tal cudesch as chatta eir üna contribuziun scritta da sia mamma Uorschliina Etter-Clavadetscher, San Niclà. Tanter aint vain chantà cun Mario Oswald, Ramosch. Quai es stat il program da l'avantmezdi. La frequentaziun dals cuors ed eir da las occurenzas es statta fich buna e nus pudain verer inavo sün ün on da grond success. Grazcha fich al comité d'organisaziun al qual fan part Ottilia Christoffel, Silvapiana, Mathilda Pernisch, S-chanf, Berta Marugg, Scuol, Ursina Ganzoni, Sent, Annina Erni, Scuol, e pels cuors paurils Gianna Martina Peer, Ramosch e Reto Lamprecht, Sta. Maria.

Dischplaschaivelmaing vain stuvü tour cumgià durant l'on da gestiun dad üna fidela commembra, chi'ns han bandunà per adüna. Quai es Irma Egler, Lavin. MINUTA DA SILENZII!

No tegnain ad ella in buna memoria. Pro alch sortidas ma impustüt grazcha e differentas entradas es creschü il nomer da commembras e commebers da 214 sün 219.

La situaziun finanziaria da nossa società es allegraivla. La buna partecipaziun als cuors e referats sco eir la bainvuglientscha da diversas persunas ed instituziuns chi han fat donaziuns generusas, han influenzà considerabelmaing il bun resultat. Davart dal relasch da d'Irma Egler vain survgni l'import da CHF 8'870.-. Las entradas cun dar a fit la chasa Fliana sun danovmaing creschüdas per bod CHF 9'000.-, quai impustüt causa l'instancabel ingaschamaint da nossa administradura Anna Margaritta Filli-Barbüda, Lavin. Grazcha fichun.

Cliaints novs da mia Engiadina pon far adöver d'üna sporta generusa da tala. Pro l'annunzcha d'ün abunamaint d'attach vi da la rait da fibra da vaider FTTH pon els tscherner al destinader (societats o sportists) chi survain l'import da CHF 50.-. Per la Chasa Fliana as han decis: Cumün da Zernez, Zernez, Pendicularas Scuol, Scuol, Hermann Christen, Möriken, Zwicky Ulrich, S-chanf, Doris Häfliger, S-chanf, Christoph Hofmann, Zuoz, Martin Ilg, Zuoz, Schimun Caratsch, S-chanf, Roman Meng, S-chanf, Armon Lehner, Ftan e Linard Parli, S-chanf. Tala acziun generescha per nossa società durant l'on da gestiun ün entrada da CHF 550.-. Grazcha fichun.

Nos ingrazchamaint va a tuottas persunas, chi han eir quist on contribui vi da la prosperità da nossa società. Quai sun las commembras e commebers, donaturas e donatuors pel sustegn financial, tuottas predichantas e tuots predichants per las meditaziuns, a Christa Pinggera, Zernez, per l'accumpagnamaint musical, a Cilgia Etter, San Niclà, chi pissera per la buna schoppa, ad Anna Margaritta Filli, Lavin, pel sustegn in chasa Fliana ed in chasa da scoula, a Jolanda Thanei, Sent, per la bellas fotografias, a duonnas ed hommens e chi güdan pro'l giantar ed a rumir la sala polivalenta, a las numerusas persunas chi tachan oura ils placats da nossas occurenzas in ils singuls cumüns, a las medias da massa per las publicaziuns sur da las activitats da nossa società sco eir a tuottas otras persunas, chi sustegnan in qualsia möd La Fliana.

Grazcha fichun eir als organs da nossa società, nempe al cussagl, a la suprastanza ed als revisurs da quint per la buna collavuraziun.

Scuol, 27 marz 2019

Il president: *Jachen Erni*